



KULIM - Jawatankuasa Bertindak Penduduk Gunung Bongsu akan berjumpa dengan Menteri Besar Kedah, Datuk Seri Mukhriz Mahathir untuk memohon membatalkan geran milikan tanah di hutan Gunung Bongsu.

Jurucakapnya, Suhar Mohd Sharif berkata pembatalan geran ini penting untuk memastikan aktiviti pembalakan di kawasan itu tidak terus berulang lagi.

Menurutnya, jawatankuasa akan memohon kerjasama menteri besar selaku pemilik Syarikat Menteri Besar Incorporation (MBI) supaya geran tersebut dibatalkan terus tanpa syarat secepat mungkin.

"Kita telah buat empat tuntutan tapi setakat ini hanya satu tuntutan ditunaikan iaitu menghentikan kerja pembalakan dan kuari di atas tanah itu.

"Untuk elakkan sebarang aktiviti pembalakan berlaku lagi pada masa akan datang, geran Lot PT686 kompartmen 28 Hutan Simpan Gunung Bongsu perlu dibatalkan segera dan digazetkan sebagai KSAS (Kawasan Sensitif Alam Sekitar) tahap satu.

"Bagi memastikan perkara ini dilaksanakan, kami mahu berjumpa dengan menteri besar dan akan meminta bantuan Ahli Parlimen dan Adun kawasan ini,"katanya kepada Sinar Harian.

Katanya, sebelum ini bantahan juga telah dikemukakan pihaknya mengenai aktiviti itu dan telah berlangsung mesyuarat jawatankuasa daerah namun ia masih berulang.

"Tahun lepas bulan September kami telah adakan mesyuarat jawatankuasa daerah, ada arahan hentikan aktiviti tersebut, ia berjaya dihentikan sekejap tapi tahun ini berlaku balik.

"Jadi selagi tidak dibatalkan geran, tak ada jaminan perkara ini tidak berulang pada masa akan datang,"katanya.

Bagaimanapun, katanya pihaknya menyambut baik apabila kontraktor syarikat terbabit telah akur untuk menghentikan aktiviti dan membawa keluar semua mesin di situ.

"Kami gembira dengan perkara itu, tapi masih bimbang akan berulang kembali pada masa akan datang.

"Terima kasih kepada semua pihak yang membantu terutama ahli Parlimen dan Adun di sini,"katanya.

Terdahulu, penduduk kampung telah beberapa kali mengafakan bantahan mengenai isu terbabit dan ia mendapat perhatian Ahli Parlimen Kulim-Bandar Baharu Datuk Saifuddin Nasution Ismail dan Adun Kulim, Yeo Keng Chuan.

Semalam, dalam laporan akhbar Sinar Harian Saifuddin telah menyatakan isu bantahan penduduk Kampung Sungai Tengah telah selesai apabila kontraktor syarikat MBI Corporation telah menghentikan operasinya di situ.